

6

KISHA QË NDËRTOI JEZUSI

Mësuam nga Veprat 2 se, kur dikush pagëzohet, Zoti e bën anëtar të kishës së tij. Një tjetër varg, që na mëson të njëjtën të vërtetë, është 1 Korintasve 12:13, që thotë se “ne jemi pagëzuar . . . në të njëjtin trup”. Siç do ta shohim, fjala “trup” i referohet kishës.

Çfarë është kisha ekzaktesisht? Shumë njerëz, kur dëgjojnë fjalën “kishë”, mendojnë për ndonjë sekt fetar. Përpiquni gjatë këtij studimi që të largoni nga mendja të gjitha organizatat fetare të krijuara nga njerëzit. Duam të përqëndrohemi në kishën që Jezusi ndërtoi (Mateu 16:18).

ÇFARË DO TË THOTË FJALA “KISHË”?

Fjala “kishë” është përkthyer nga fjala greke *ekklesia*. *Ekklesia* është një fjalë e përbërë greke që kombinon fjalën “thërras” (*kaleo*) dhe fjalën “jashtë” (*ek*). *Ekklesia* fjalë për fjalë do të thotë “të thirrurit jashtë”. Në atë kohë fjala përdorej për t’iu referuar një asambleje njerëzish¹, por Jezusi e bëri atë një fjalë të rëndësishme. Kur përdoret për të emëruar kishën që ai ndërtoi, fjala u referohet atyre që janë “thirrur jashtë” nga bota për të pasur një marrëdhënie të re me Jezusin².

Fjala “kishë” është përdorur së paku në tre kuptime në Dhjatën e Re:

- Jezusi e përdori fjalën në kuptimin *universal* kur tha: “Mbi këtë shkëmb do të ndërtoj kishën time” (Mateu 16:18). Kur i referohet kishës në kuptimin *universal*, fjala përdoret gjithmonë në numrin njejës, sepse është vetëm një.³ Kjo është kisha në të cilën Zoti shton ata që janë pagëzuar.

- *Ekklesia* mund të përdoret gjithashtu edhe në një kuptim *lokal*, për t’iu referuar një bashkësie lokale. Kështu, lexojmë për “kishat e Galatisë” dhe “kishat e Azisë” (1 Korintasve 16:1, 19). Kur dikush pagëzohet, ai bëhet anëtar i kishës universale, por ai gjithashtu ka nevojë të punojë dhe të adhurojë si pjesë e një bashkësie lokale.⁴
- Herë pas here Dhjata e Re e përdor fjalën *ekklesia* për t’iu referuar një *asambleje*, kristianëve të mbledhur për të adhuruar Perëndinë.⁵ Për shembull, kur Pali foli për mësimin “në kishë” te 1 Korintasve 14:19, ai i referohej mësimin në asamble. (Lexoni vargun 23 të kapitullit 14. Shikoni gjithashtu 1 Korintasve 11:18.)

ÇFARË ËSHTË KISHA?

Njerëzit shpesh tregojnë me gisht një ndërtesë dhe thonë: “Ajo është kisha” apo “Ajo është kisha ime”. Nga ato që kemi thënë deri tani, duhet të jetë e dukshme se kisha nuk është një ndërtesë.⁶ Dikush ka thënë: “Kisha nuk është kurrë një vend, por gjithmonë një grup njerëzish.”

Do ta përdor shpesh fjalën “kishë” në studimin që po bëjmë. Kur e përdor, u referohem *atyre që janë shpëtuar nga gjaku i Jezusit*.

KISHË = TË SHPËTUARIT

Disa besojnë se janë shpëtuar, por megjithatë këmbëngulin se nuk janë anëtarë të ndonjë kishe. Në qoftë se janë shpëtuar, atëherë ata janë anëtarë të kishës, sepse, siç e kemi parë, Zoti ia shton të

shpëtuarit kishës (Veprat 2:47).⁷ Meqënëse Zoti i shton kishës gjithë të shpëtuarit, nuk ka njerëz të shpëtuar jashtë kishës.

Kjo e vërtetë mësohet në të gjithë Dhjatën e Re. Pali i tha një grupi pleqsh “të kullotin kishën e Perëndisë,⁸ të cilën ai e ka fituar me gjakun e tij” (Veprat 20:28). Krishti vdiq për çdo njeri (2 Korintasve 5:14, 15), por të vetmit që marrin përfitimet nga vdekja e tij janë ata që i nënshtrohen atij. Me fjalë të tjera, të vetmit që janë “blerë” në të vërtetë me gjakun e tij janë anëtarët e kishës.

Pali shkroi te Efesianëve 5:23, 25: “. . . Krishti është kreu i kishës, dhe ai vetë është Shpëtimtari i trupit. . . . Krishti ka dashur kishën dhe e ka dhënë veten e vet për të.” Në qoftë se duam të shpëtohem, duhet të jemi pjesë e asaj që Krishti e ka dashur. Duhet të jemi pjesë e asaj për të cilën Krishti sakrifikoi veten e vet. Duhet të jemi pjesë e asaj që Krishti do shpëtojë. Me fjalë të tjera, duhet të jemi pjesë e kishës së Zotit.

SI QUHEN NJERËZIT?

Në Dhjatën e Re, fjala “kishë” është emërtimi më i përhapur për njerëzit e Perëndisë, por janë përdorur edhe emërtime të tjera.⁹ Secili prej emërtimeve e bën më të kuptueshme kishën.

Trup

Kisha quhet nganjëherë edhe “trup”. Te Efesianëve 1:22, 23 Pali tha se Perëndia “vuri çdo gjë nën këmbët e tij [Jezusit], edhe ia dha për krye përmbi çdo gjë kishës, e cila është trupi i tij, plotësia i atij që mbush çdo gjë në të gjithë”.

KISHË = TRUP

Te Kolosianëve 1:18 Pali shkroi se Krishti “është kreu i trupit, pra i kishës”.

TRUP = KISHË

Fjala “trup” na tregon se, në një farë mase, kisha funksionon si një trup njerëzor. Krishti është koka e këtij trupi (Efesianëve 1:22, 23; Kolosianëve 1:18) dhe kristianët janë anëtarët (pjesët e veçanta) të trupit (Romakëve 12:4, 5; 1 Korintasve 12:12, 18–27). Trupi njerëzor ka shumë pjesë (krahë, këmbë, duar, etj.), secila me

një funksion të ndryshëm. Në të njëjtën mënyrë, trupi i Krishtit ka shumë anëtarë, secili me një funksion të veçantë dhe secili i rëndësishëm.

Mbretëri

Kisha gjithashtu quhet “mbretëri”. Pasi Jezusi tha: “Mbi këtë shkëmb unë do të ndërtoj kishën time”, ai i tha Pjetrit: “Unë do të të jap çelësat e mbretërisë së qiejve”¹⁰ (Mateu 16:18, 19a). Jezusi i përdori fjalët “kishë” dhe “mbretëri” me ndërkëmbim (me të njëjtin kuptim).

KISHË = MBRETËRI

Pali i tha kishës në Kolose se Perëndia “na nxori nga pushteti i errësirës dhe na çoi në mbretërinë e Birit të tij të dashur” (Kolosianëve 1:13).

Fjala “mbretëri” tregon se anëtarët e kishës janë të nënshtroar ndaj Mbretit Jezus. Jezusi tani mbretëron në fronin e tij në qiell (Veprat 2:29–36) dhe do të vazhdojë “të mbretërojë derisa t’i vërë të gjithë armiqtë e tij nën këmbët e veta. Armiku i fundit që do të shkatërrohet është vdekja” (1 Korintasve 15:25, 26).

Familje

Një nga fjalët e mia të preferuara për kishën është “familja” e Perëndisë. Pali i tha Timoteut se po shkruante në mënyrë që kristianët të dinë si të sillen “në shtëpinë e Perëndisë, që është kisha e Perëndisë së gjallë” (1 Timoteut 3:15).¹¹ Fjala “shtëpi” në këtë varg do të thotë “familje”.¹²

KISHË = FAMILJE

Në këtë familje shpirtërore, Perëndia është Ati (Mateu 6:9), Jezusi është vëllai i madh (Hebrenjve 2:11, 12) dhe kristianët janë vëllezërit dhe motrat (Jakobi 2:15). Familja ime është shumë e rëndësishme për mua, por familja shpirtërore e Perëndisë, kisha, është akoma më e rëndësishme.

Këto fjalë, “kishë”, “trup”, “mbretëri” dhe “familje” nuk janë sinonime. Përkundrazi, ato janë katër përshkrime të ndryshme që i referohen të njëjtit grup njerëzish. Le ta ilustrim me një shembull. Unë jam baba, bashkëshort, bir dhe vëlla. Fjalët “baba”, “bashkëshort”, “bir” dhe “vëlla” nuk janë sinonime, por të gjitha

më përshkruajnë mua. Ato tregojnë një larmi marrëdhëniesh që unë kam. Në të njëjtën mënyrë, katër fjalët e përdorura për t'iu referuar kishës sugjerojnë një larmi marrëdhëniesh shpirtërore:

- Në marrëdhënie me botën, kristianët janë kisha, të thirrurit jashtë botës për te Jezusi.
- Në marrëdhënie me njëri-tjetrin, kisha është trupi. Anëtarët duhet të funksionojnë si një trup i vetëm dhe të kujdesen për njëri-tjetrin.
- Në marrëdhënie me Jezusin, anëtarët e kishës janë mbretëria e tij, ata që i kanë dhënë atij zemrat dhe jetët e tyre.
- Në marrëdhënie me Perëndinë, kristianët janë familja tij, fëmijët e tij të dashur.

KONKLUZION

Nga ato që kemi studiuar, duhet të jetë e qartë se është e rëndësishme të jemi pjesë e kishës së Perëndisë. Është thelbësore të jemi anëtarë të kishës së Perëndisë në qoftë se dëshirojmë të shpëtohem. Pyetja e rëndësishme, pra, është: “A jeni anëtar i kishës së Perëndisë?”

¹ Me këtë kuptim është përdorur te Veprat 19:30, 32, 33, 39, 41.

² Jemi thirrur nga ungjilli (2 Thesalonikasve 2:14) dhe duhet t'i përgjigjemi asaj thirrjeje me besim dhe bindje.

³ Efesianëve 4:4 thotë se ka “një trup”. Siç do ta studiojmë më pas në këtë mësim, trupi për të cilin bëhet fjalë është kisha (Efesianëve 1:22, 23).

⁴ Edhe pse letrat në Dhjatën e Re janë shkruar për të gjitha kishat, ato gjithmonë i adresohen një bashkësie lokale. Bashkësitë lokale janë shprehja praktike e kishës universale.

⁵ E vetmja mënyrë biblike për të përdorur frazën “shkoj në kishë” është që të nënkuptojë shkuarjen në asamblenë (mbledhjen) e shenjtorëve për të adhuruar Perëndinë.

⁶ Një ndërtesë kishë mund të shërbejë si mjet për të ndihmuar kishën të përmbushë misionin e saj, por ndërtesa nuk është kisha.

⁷ Shiko shënimet për Veprat 2:38, 41 dhe 47 në faqet 3 dhe 4 në mësimin “Çohu dhe ji i pagëzuar (1)”.

⁸ Ky është Zoti, Biri. Ishte Jezusi ai që bleu kishën “me gjakun e tij”.

⁹ Në shembëlltyrën e mbretërisë së Jezusit, mbretëria (kisha) krahasohet me një fushë, vresht dhe gjëra të tjera të njohura. Kështu lista e fjalëve mund të zgjerohet.

¹⁰ Premtimi për t'i dhënë Pjetrit “çelësat e mbretërisë” nuk do të thoshte se Pjetri do të ishte më i rëndësishëm se apostujt e tjerë. Përkundrazi, si shpërblim që ishte i pari që kuptoi se kush ishte Jezusi, Pjetri do të ishte i pari që do t'iu tregonte njerëzve si do të merrnin faljen e mëkateve (Veprat 2:14–41). Pjetri ishte i pari që përdori “çelësat” për t'iu futur njerëzit në mbretëri (kishë), por ai nuk ishte i vetmi. (Shiko p.sh., Veprat 22:16.)

¹¹ Vargje të tjera që i referohen shtëpisë së Perëndisë janë Efesianëve 2:19 dhe 1 Pjetër 4:17.

¹² Bëhet krahasimi midis shtëpisë së një plaku (familjes së tij) dhe shtëpisë së Perëndisë (familjes së Perëndisë, kishës). (Shiko 1 Timoteut 3:4, 5, 15.)

Autor: *David Roper*

Marrë nga studimi: *“Udhëzues për shpëtimin e të gjithëve”*

© 2001, 2003 E VERTETA PËR SOT

Të gjitha të drejtat të rezervuara